



քաղ. գործ թիվ ՀԿԴ/0177/02/23

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱԿԱԿՈՌՈՒՊՑԻՈՆ ԴԱՏԱՐԱՆ Ո Ր Ո Շ ՈՒ Մ

Երրորդ անձ ներգրավելու մասին

«12» մարտի 2024թ.

ք. Երևան

ՀՀ հակակոռուպցիոն դատարանի դատավոր Կ.Բադալյանը քննարկելով թիվ ՀԿԴ/0177/02/23 քաղաքացիական գործով երրորդ անձ ներգրավելու մասին հայցվորի ներկայացրած միջնորդությունը.

Պ Ա Ր Զ Ե Ց Ի

ՀՀ գլխավոր դատախազությունը 12/09/2023 թվականին հայցադիմում է ներկայացրել ՀՀ հակակոռուպցիոն դատարան ընդդեմ Կոտայքի մարզի, Նաիրի համայնքի ղեկավարի, երրորդ անձ՝ Իրինա Վալտերի Բաբոյանի՝ հողամասերի աճուրդն անվավեր ճանաչելու և անվավերության հետևանքներ կիրառելու պահանջի մասին:

Հայցադիմումը կից փաստաթղթերով դատավորի աշխատակազմին է հանձնվել 13/09/2023 թվականին:

Դատարանի 14/09/2023 թվականի որոշմամբ թիվ ՀԿԴ/0177/02/23 քաղաքացիական գործն ընդունվել է վարույթ:

Դատարանը 14/09/2023 թվականին որոշում է կայացրել հայցի ապահովման միջոց կիրառելու միջնորդությունը մասնակի բավարարելու մասին:

13/12/2023 թվականին Դատարանը որոշում է կայացրել «Ապացուցման պարտականությունը բաշխելու մասին»:

19/02/2024 թվականին հայցվորը Դատարան է ներկայացրել միջնորդություն՝ վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավելու մասին:

06/03/2024 թվականի դատական նիստում հայցվորը պնդել է միջնորդությունը և հայտնել հետևյալը.

Կադաստրի պետական կոմիտեից տրամադրված Քասախ համայնքի Ե.Չարենցի 4-րդ փողոցի թիվ 21-րդ հասցեի կադաստրային գործի ուսումնասիրությունից պարզվել է, որ Իրինա Բաբոյանը 2012 թվականի սեպտեմբերի 6-ին Լիբանանի Հանրապետության քաղաքացի Սարգիս Նաճարի Աղազարեանի հետ կնքել է անշարժ գույքի առուվաճառքի թիվ 2263 պայմանագիրը՝ Քասախ համայնքի Ե.Չարենցի 4-րդ փողոցի թիվ 21-րդ հասցեի 0.0800 հա հողատարածքն Սարգիս Աղազարեանին՝ ի դեմս վերջինիս լիազորված անձ Աիդա Բենիամինի Խանզադյանին (հասցե՝ ք. Երևան, Նալբանդյան փողոց, շենք 25Ա բն 12) օտարելու վերաբերյալ, որի հիման վրա 12/09/2012 թ. վերջինիս տրվել է անշարժ գույքի նկատմամբ իրավունքի պետական գրանցում:

Այնուհետև, Սարգիս Նաճարի Աղազարեանը նույն հողամասը 23/09/2014 թվականին կնքված անշարժ գույքի առուվաճառքի պայմանագրով օտարել է Բրաբիոն Մկրտիչ Մինասեանին:

Սույն քաղաքացիական գործով կայացվելիք դատական ակտը անխուսափելիորեն ազդելու է Սարգիս Նաճարի Աղազարեանի և Բրաբիոն Մկրտիչ Մինասեանի իրավունքների և պարտականությունների վրա, որպիսի պայմաններում միջնորդում եմ նրանց ներգրավել վեճի առարկայի նկատմամբ ինքնուրույն պահանջ չներկայացնող երրորդ անձ:

Քննելով միջնորդությունը և ուսումնասիրելով քաղաքացիական գործի նյութերը, Դատարանը հանգում է հետևյալին.

ՀՀ քաղաքացիական դատավարության օրենսգրքի 38 հոդվածի 1-ին մասի համաձայն՝ վեճի առարկայի նկատմամբ ինքնուրույն պահանջներ չներկայացնող երրորդ անձինք կարող են գործի մեջ մտնել հայցվորի կամ պատասխանողի կողմում մինչև դատաքննության ավարտը, իսկ սույն օրենսգրքի 41-րդ և 42-րդ գլուխներով նախատեսված կարգով քննվող գործերով՝ մինչև եզրափակիչ դատական ակտի հրապարակումը, եթե գործով կայացվող վճիռը կարող է ազդել կողմերից մեկի հանդեպ նրանց ունեցած իրավունքների կամ պարտականությունների վրա կամ կարող է հանգեցնել նման իրավունքների և պարտականությունների ծագմանը:

Նույն հոդվածի 4-րդ մասի համաձայն՝ եթե գործին մասնակցող անձը գտնում է, որ դատական ակտն անխուսափելիորեն ազդելու է որոշակի անձանց իրավունքների և պարտականությունների վրա, ապա կարող է առաջին ատյանի դատարանին ներկայացնել տվյալ անձին որպես վեճի առարկայի նկատմամբ ինքնուրույն պահանջ չներկայացնող երրորդ անձ ներգրավելու միջնորդություն:

Օրենսգրքի 38 հոդվածի 5-րդ մասի համաձայն վեճի առարկայի նկատմամբ ինքնուրույն պահանջներ չներկայացնող երրորդ անձին գործին ներգրավելու կամ ներգրավելու դիմումը մերժելու մասին առաջին ատյանի դատարանը կայացնում է որոշում՝ առանձին դատական ակտի ձևով:

Ներկայացված փաստաթղթերը վկայում են, որ Կադաստրի կոմիտեի կողմից ստացված տվյալների համաձայն Քասախ համայնքի Ե.Չարենցի 4-րդ փողոցի թիվ 21-րդ հասցեի հողամասը Իրինա Բաբոյանը օտարել է Սարգիս Նաճարի Աղազարեանին, ով էլ այնուհետև օտարել է հողամասը Բրաբիոն Մկրտիչ Մինասեանին, հետևաբար Դատարանը գտնում է, որ միջնորդությունը հիմնավոր է, քանի որ գործով հնարավոր վճիռը կարող է ազդել կողմերից մեկի հանդեպ նշված անձանց ունեցած իրավունքների կամ պարտականությունների վրա կամ կարող է հանգեցնել նման իրավունքների և պարտականությունների ծագմանը:

Ելնելով վերոգրյալից և ղեկավարվելով ՀՀ քաղաքացիական դատավարության օրենսգրքի 38,199-200-րդ հոդվածներով.

Ո Ր Ո Շ Ե Ց Ի

Հայցվորի միջնորդությունը բավարարել:

Թիվ ՀԿԴ/0177/02/23 քաղաքացիական գործով պատասխանողի կողմում որպես վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավել Սարգիս Նաճար Աղազարեանին և Բրաբիոն Մկրտիչ Մինասեանին:

Թիվ ՀԿԴ/0177/02/23 քաղաքացիական գործով ևս մեկ նախնական դատական նիստ նշանակել 2024 թվականի ապրիլի 22-ին, ժամը 15:00-ին՝ ՀՀ հակակոռուպցիոն դատարանի Երևանի նստավայրում (հասցե՝ Երևան, Թբիլիսյան խճուղի 3/9, նիստերի դահլիճ 8):

Որոշումն ուժի մեջ է կայացման պահից և ենթակա չէ բողոքարկման:

ԴԱՏԱՎՈՐ



Կ. ԲԱԴԱԼՅԱՆ